

## Xujun xi tjun kits'ínkjihí nda postru Pablo Timoteo

*B'i ts'ín kikjaniñaha Pablo Timoteo*

<sup>1</sup> An Pablo, an xi kama nku nda postruhu Jesu-cristo xi nkú ts'ín y'éjña Ntíaná xi ts'ínk'ankiná kō Jesucristo xi tichuyáhaá.

<sup>2</sup> Tífaniñaha Timoteo, ji xi ntína at'aha nkuhú xi s'ejinná.

Katsjáhi kjuanda kō kjuajyu Ntia Na'miná kō Nda Ntíaná Cristo Jesu kō nda katasehi.

*B'i ts'ín kitsúyaha Pablo Timoteo ni xi tjihin nga ts'ínko já maestru xi tsank'á*

<sup>3</sup> Xi nkú ts'ín tsankihi nk'ie nga ngjia ante Macedonía, tinchin nanki Efeso kixihin kō t'ech'óihí xuta xi najmi b'a tjín ni xi títakúya,

<sup>4</sup> at'aha éenchá xi nchja xuta kō xi nkú ts'ín nibatuts'ihín ra ntje cháha títs'ínsihín. At'aha yo nibáha ra nga b'ésiko xinkjín xuta. Najmi basinkoná nga n'ée xá xi kitsjáná Ntíaná. Nga ní s'ejinná, kui ní nihi xi basinkoná.

<sup>5</sup> Mjena nga s'e kjuatjo, kui kjuaha nga tsankihi ra nga k'úéch'ohó rí xuta xu'bo. At'aha nk'ie nga je animaha xuta kō je s'eya kjuankjintak'uhun kō ngayjehe k'un ts'ín s'ejin Ntíaná, yo ní nibáha ra kjuatjo.

<sup>6</sup> Tjín xi ja ngji t'axíhín ni xu'bjí. Kindyjajihín niyóo kō tsichujnejin én xi najmi tjíhín sin.

7 Já maestruhu kjuatéxumaha Ntíaná mjehe ts'ín ma yjoho, ndaha tsa najmi mankjihin ni xi nchja ko chuba b'ahá tsu nga b'a tjin ni xi bakúya.

8 Yaá nga nda kjuatéxumaha Ntíaná tsa sakúya xi nkú ts'ín tjihin nga sakúya.

9 At'aha yaá nga najmi xuta xi ma naxu nginkun Ntíaná tjñanehe kjuatéxumoo. Xi najmi nt'één ní tjñanehe kjuatéxumoo, xi najmi benkjún Ntíaná ko ts'ín ngatitsun, xi najmi ts'ín ni xi naxu tjin ko najmi benkjún ni xi ts'e Ntíaná, xi ts'ínk'ien na'mihí ko ts'ínk'ien naaha ko ts'ínk'ien aníma,

10 xi chuba fantukohó xinkjín, xi na, xi batéña xuta musu, xi nchja én tsank'á, xi najmi ts'intjusun ni xi ts'ínkie Ntíaná nga ts'ín, ko xi ts'ín tu mí nihí ni xi fi kontraha ni nda xi bakuyáá.

11 At'aha ni nda xi bakuyáá, yo nibaha ra én nda tsu chánkaha Ntíaná xi n'etsjoho. Ko an kik'ajina nga k'uenijmía kui én nda tsuu.

*B'i ts'ín títsjáha Pablo máb'achjhi Cristo at'aha kui kits'ín mahá nku nda postru*

12 Tsjaha máb'achjhi Nda Ntíaná Jesucristo xi tsjá nga'yúnna, at'aha tsasejnuna nga kamana ts'ian xáha,

13 ndaha tsa ch'on ts'ín kinchjané nistjin nk'ie ko kitsjennkí unkie xuta xi ts'e ko én ch'on tsu kixihin. Tunga kama nimahá ra an at'aha najmi be ni xi kits'ian ko najmi kjee kui s'ejinna.

14 'Yún nda kits'ínkona Nda Ntíaná ko kitsjana nga kui s'ejinna ko kitsjana kjuatjo xi kui nibaha ra.

15 Én xi ma n'e s'ejin xu'bi ko ngayjee xuta tjihin nga ts'ín s'ejin, nga Cristo Jesu j'ai asuntei tu xi

j'ai ts'ínk'ankihi xuta ngatitsun, b'aha ra an xi 'yún tjínna jé.

<sup>16</sup> Tunga kuihí kjuaha kama nima ha ra an Ntjaná, tu xi nk'ie nga chahana an xi 'yún tjínna jé, kuakúchjiji Jesucristo ngayjee kjuatsentaha. B'a ts'ín kis'ejña chubayaha ra an xuta xi askahan s'ejihin Jesucristo ko sakúhu nga k'úéntu tík'un sín.

<sup>17</sup> Kui b'a maha, ikayankjún ko kats'ínkie yjoho xuta nga tjihin kjuachánka santaha tu nkjéhé ni Ntjaná xi Nda rei xi batéxuma sín, xi najmi maha 'me, xi najmi ma chji, xi nku tutu Ntjaná maha! B'a katuma.

<sup>18</sup> Ji Timoteo, xi nkúhu tsa ntína ji, ja kuaxinyaha ni xi n'ei. Én xi kitsjáhi já xi kinchja én xi kitsjáha Ntjaná nibáha ra kui ni. En xi incha kitsú kuasinkohi nga nda kuitjusun xá xi t'n'ei.

<sup>19</sup> Ndjá tisinjñajin ni xi s'ejinná ko je kas'eya kjuankjintak'uhin. At'aha tjín xi ja kits'ín t'axín ni xu'bi ko b'a ts'ín kits'ínndyjajihin ra yjoho. Najmi ta s'ejihin ra Ntjaná.

<sup>20</sup> B'a kamat'ain nda Himeneo ko nda Alejandro. Kui jóo xi ja kits'inkjas'en aya ntsja ndanindoo tu xi katehe nga tjihin nga skuenkjún Ntjaná nga kuinchja.

## 2

### *B'i ts'ín tsakúya Pablo ni xi n'e aya ninku*

<sup>1</sup> Títjun títbankia nga xuta ninku katankihí Ntjaná ni xi machjéhen. Kanchjako ko katankintjái ngayjee xuta xi tjín ko katsjáha máb'achjíhi nga nda tít'ínkoho.

<sup>2</sup> Kanchjantai já rej kō ngayjee já xi tjihin xá, tu xi kjuajyu kō kjuanch'an s'ehená nga kuintsubaá kō tu nku chankjúhunná Ntjaná kō nda kuintsubaá.

<sup>3</sup> At'aha kui ni xu'bj xi nda kō sasihin Ntjaná xi ts'ínk'ankiná.

<sup>4</sup> Mjehe Ntjaná nga n'ek'anki ngatentee xuta kō nga kuichú mankjihin ni xi naxu tjin.

<sup>5</sup> At'aha nkuhú maha Ntjaná kō nkuhú maha nda xi nchjantjai xuta nginkun Ntjaná. Jesucristo, kui xi nda xu'bo.

<sup>6</sup> Kui xi kitsjá yjoho nga y'échjintjai ngayjee xuta. Kui niu xi kik'inyaha xuta nk'ie nga tsichu nistjin xi y'enda Ntjaná.

<sup>7</sup> Kui kjuaha nga kin'e mahana nku xi b'énijmí én nda tsuhu Ntjaná, nku nda postru. Kjuaxi ni xi tíxian. Najmi túb'anacha. Kin'e mana nda maestruhu xuta xi najmi ntje judio tjeheñ rā tu xi kuakuyáha rā ni xi tjihin nga s'ejihin, ni xi naxu tjin.

<sup>8</sup> Kui b'a maha, mjena nga tu má antehé ni kanchjako Ntjaná jáx'iun, katjénk'ahá ts'ihin ntsja kō je kas'eya animaha nga b'a incha ts'iin. Najmi tu kjuakjan tjintujihin nga b'a incha ts'iin kō tsa kjuastinta.

<sup>9</sup> Kō máha jminchjün, mjena nga najmi tu ni xi nkjün ts'in k'uenda yjoho, tsa tu xi b'a ts'in nda skuehe rā xuta xingisoo. Katenkjün ní yjoho kō nimakjua kat'asje. Najmi tu nihi xi nkjün ts'in kat'enda ntsjaha, tsa ts'iintsejnúhu yjoho toonsine kō tsa ndjio tsjo k'un perla, kō tsa ngjua najyun xi 'yún chjí.

<sup>10</sup> Xá xi nda ní n'e, kui niu xi tsjo ts'ín katakúhu, xi nkú ts'ín tjeheñ ra jminchjín xi ja kitsjáha yjoho nga skuenkjún Ntíaná.

<sup>11</sup> Jyu katasínñju jminchjún ni xi tísakúyaha ko kant'é'éhen éen.

<sup>12</sup> Najmi tsjanté tsa nku tachjuún kuakúya aya nínku ko tsa kui nk'a kj'uahá jáx'iún. Tū sa ní jyu kat'ejña.

<sup>13</sup> At'aha najmi Eva tjun kin'enda, tjun ní Adan kin'enda.

<sup>14</sup> Ko najmi Adan xi kich'anachaha. Tachjúun ní xi kich'anachaha ko b'a ts'ín tsijnejihin ngatitsun.

<sup>15</sup> Tunga n'ek'ankihí jminchjún nga kuasehe ntí xi s'ehe, tsa ndjá kuinchajin ni xi s'ejinná ko kjuatjoo ko ni xi je nginkun Ntíaná, ko tsa nda s'eyaha.

### 3

*B'í ts'ín tsakúya Pablo má jáha xi kama ts'ín xáha nínku*

<sup>1</sup> Én xi ma n'e s'ejin xu'bi. Tsa tjín xi mjehe kuasehe xuta nínku, nda tjín xá xi mjehe.

<sup>2</sup> Tunga katumahá nda xi kuasehe nínku nku nda xi najmi tjín ni xi chubayanéhe ra, xi nkuhú maha chjuúhun, xi kixi fiko yjoho, xi nda basehe ni xi ts'ín, xi benkjúhun xuta, xi nda ts'ínkjáihin xuta ni'yaha, xi maha bakúyaha xuta,

<sup>3</sup> xi najmi 'yún 'bi binu, xi najmi kitsa ma kjahan, xi nda animaha, xi tsjoho kjuajyu, ko xi najmi toon mangimjehe.

4 Tj́ihin nga nda ts'ín kuatéxumaha xuta xi tj́in ni'yaha ko ts'ín nga ntíhi kuint'é'éhen ko nga kixi skuenkj́uhun.

5 At'aha nku nda xi najmi maha batéxumaha xuta xi tj́in ni'yaha, ¿nkú ts'ín kamaha ra kúnntaha nínkuhu Ntíaná?

6 Ko najmi tj́ihin nga s'et'a xá nku nda xi as'ai kis'ejihín ra Ntíaná, tu xi najmi nk'a k'uasjehe yoho ko kuijneihin ngatitsun xi tsijnejin ndanindoo ko b'a ts'ín n'enijéhe ra.

7 Nda xi mjehe xá xu'bi ta tj́ihin nga ja yankjún ajihin xuta xi najmi s'ejihín Ntíaná, tu xi najmi ch'a ch'on ts'ín kuinchjayanéhe ra ko tu xi najmi kuijneihin kjuamañaha ndanindoo.

8 B'a ta tj́in ts'e já xi basinko já xi basehe nínku. Tj́ihin nga já xi benkjún yoho s'et'a xá, xi najmi nchja én tsank'á, xi najmi b'atihí nga 'bi binu, xi najmi mjehe toon xi ch'on ts'ín sakú.

9 Tj́ihin nga ndjá katinchajin ni xi s'ejinná, ni xi kis'ejña 'ma nistjin nk'ie ko tís'ejña chji nd'ai, ko je kas'entuyá kjuankjintak'uhun.

10 Tjun kachase sisihín xi nkú ts'ín tj́ima já xu'bi. Tsa najmi chumi nihi xi sakújin, kas'et'a xá nga kuasinko já xi basehe nínku.

11 Ko b'a ta ts'ín jminchjún, tj́ihin nga katenkjún yoho, najmi tu én tsank'á k'uasjené xuta, kixi katjiko yoho, ko katuma 'yún tak'aán.

12 Nkuhú chjuún kas'ejñaha nda xi k'uai xáha nga kuasinko já xi basehe nínku. Tj́ihin nga nda ts'ín kuatéxumaha ntíhi ko xuta xi tj́in ni'yaha.

13 At'aha xi kixi fiko xá xu'bi, kui xi yankjún ajihin xuta xingisoo ko najmi jo jan maha nk'ie

nga b'énijmí nga ja kis'ejih<sub>in</sub> Jesucristo.

<sup>14</sup> Ndaha tsa mjena kfínse xatíhi, tunga tíb'et'áhá ra ni xu'bi

<sup>15</sup> tsa tu aha k'uandayana nga kfínsehe. Tíb'et'áha kui ni<sub>j</sub> tu xi b'a ts'ín chahani xi nkú ts'ín xuta xi ts'e Ntíaná, kui xi xuta ninkuh<sub>u</sub> Ntíaná xi tíjña tík'uun. Tíincha kjanínk'a ko tsjá nga'yúh<sub>u</sub> én xi naxu tjín.

<sup>16</sup> Tíjña chji chji nga 'yún tse ni xi y'ahá ra ni xi s'ejinná, kui nihi xi kis'ejña 'ma nistjin nk'ie ko ja y'éjña chji Ntíaná nd'ai.

Tsakúchji yjoh<sub>o</sub> nga kik'a yjoninte, y'éjña chji Espiritu nga kui xi naxu.

Ntítsjee kíkíehe,

kis'enijmíhi ajih<sub>in</sub> xuta.

Xuta asunntej kis'ejih<sub>in</sub> kui,

ko ngji ngáha má tíjña kjuachánkaha.

## 4

*B'i ts'ín kitsúyaha Pablo Timoteo nga s'e xi ngjuai t'axíh<sub>in</sub> én nda tsuh<sub>u</sub> Cristo*

<sup>1</sup> Tsuya chji chji Espirituh<sub>u</sub> Ntíaná nga nistjin xi fekuu s'e xi ngjuai t'axín ko nga najmi ta s'ejih<sub>in</sub> ra Ntíaná. Tsjénnkihi jáninda xi k'uanachaha xuta ko ni xi kuakúya jánindoo.

<sup>2</sup> Kui niu xi kuitsuya já maña tsank'á xi tu tsjohó ra bakúchji xi nkú ts'ín benkjún Ntíaná, kui já xi ja tsatsun kjuankjintak'uh<sub>u</sub>.

<sup>3</sup> Kui jóo najmi ts'ínj'ó nga bixan xuta ko b'éch'o má nihi xi najmi ma chine, nichine xi Ntíaná y'éjña nga kjine xuta xi s'ejih<sub>in</sub> Ntíaná, xi ja kíkíe ni xi naxu tjín ko tsjáha má b'achjíhi Ntíaná nk'ie nga kjine ni xi tjín.

<sup>4</sup> Nda ní ngayjee ni xi kits'ínnda Ntìaná. Najmi tjíhin nga n'è t'axíáán niu tsa k'uáihì máb'achjíhì Ntìaná nga títsjáná.

<sup>5</sup> At'ahá bichú ma je nginkun Ntìaná ni xi sakúná nk'ie nga mankjinná éhèn Ntìaná kò nk'ie nga chubakaá Ntìaná.

*B'ì ts'ín kitsúyahá Pabló Timoteo xi nkú ts'ín k'úéjñajihìn xutá nínku*

<sup>6</sup> Nda ts'ín n'exát'aihì Jesucristo tsa b'ì ts'ín kuakúyaihì já nts'eé. Kasakú nga'yúnkoihì én xi s'ejinná, én nda xi tsinchiyái kò kich'ai.

<sup>7</sup> Najmi tū n'esihìn érchá nchìni xi ts'e asunnteì. N'enkahì animahì ni xi ts'e Ntìaná.

<sup>8</sup> Kjuaxì kjáihìn nga nk'ie nga n'enkahaá yjoná nku ni, basinkoho yjonintená. Tunga 'yúhún basinkoná nga n'enkahaá animaná nga chankjáán Ntìaná. At'ahá nga tíyankjáán Ntìaná, kui xi basinkoná xi nkú ts'ín tintsubaá nd'ai kò ta xi nkú ts'ín kuintsubaá askahan.

<sup>9</sup> Én xi ma n'e s'ejin xu'bì kò ngayjee xutá tjíhin nga ts'ín s'ejin.

<sup>10</sup> Kui kjuaha 'yún tín'exáhaná kò tí'báihì ráá kjuanimá yjoná, at'ahá tíchuyáá ni nda xì tsjáná Ntìaná xi tíjña tík'un. Kui xi mahá ts'ínk'anki ngayjee xutá, xi s'ejihìn kui b'ahá rá nga ts'ínk'anki.

<sup>11</sup> B'a ts'ín tjenniyáihì xutá kò takúyaihì.

<sup>12</sup> Najmi tū ch'a xi tū tohón katumaha ji at'ahá ndati. Nk'ie nga skuèhi xutá xi s'ejihìn Ntìaná xi nkú ts'ín chubai, xi nkú ts'ín tinchin, xi nkú ts'ín n'etjói xutá, xi nkú ts'ín s'ejihìn Ntìaná, kò xi nkú ts'ín je tinchin nginkun Ntìaná, ta katumaha kui niì.



13 N'eyajihin xuta ninku éhen Ntíaná, takúyai ko tjen nga'yúihin santaha nga kuichá yo.

14 Najmi tu n'e nga mahi yjohi kjuanda xi kik'aihi nk'ie nga kitsjáhi éhen Ntíaná já xi Ntíaná kits'ínkinchaha. B'a kama nk'ie nga kingjénnehi ntsja jácháha xuta ninku.

15 Nda n'esihin ni xu'bi ko tisinjñajin, tu xi skuehe ngayjee xuta nga tíxubáya ni xi kik'aihi.

16 Chihin yjohi ko nda chasehi ni xi túbakuyái. N'etjusun tehentei niu. Tsa b'a n'ei, n'ek'anke yjohi ko ta n'ek'anke xi tíncha basínñihi.

## 5

*B'i ts'in kitsúyaha Pablo Timoteo xi nkú ts'in ts'íinxáko xuta ninku*

1 Najmi tu ndjá chubakoi nku nda chá. Tjenniyáihí xi nkúhu tsa na'mihí maha. B'a ta n'ekoi já xunkúu xi nkúhu tsa já nts'ei maha.

2 Ko tjenniyáihí jminchjín chóo xi nkúhu tsa náhi maha, ko istinchjín xunkúu xi nkúhu tsa nichjai maha. Je kas'eya animahi nk'ie nga tjenniyáihí jminchjín.

3 Tisinkoi jminchín xi ja k'ien x'ihin, kui xi najmi ch'a xi tjihin.

4 Tunga tsa nku tachjuún xi ja k'ien x'ihin xi naa ko tsa nachá tí'mi, xi títsu naa ko tsa nachá, kui xi tjun katuma chubayaha ni xi tjihin nga ts'ín at'aha ja s'ejihin Ntíaná. Kats'ínk'óya ngáha ra kjuanda xi kitsjáha xi cháha nk'ie nga kjintí. At'aha kui ni xi sasihin Ntíaná.

5 Nku tachjuún xi ja k'ien x'ihin ko xi najmi ch'a xi tjihin, kui xi kuyá nga Ntíaná kuasinkoho.

Nistjin nistjen nchjako Ntjaná nga bankihí ni xi machjéhen.

<sup>6</sup> Tunga xi ja kits'ínkjas'eheñ yjoho kjuatsjo xi tjín, kui xi ja k'ien ndaha tsa tíña tík'un sa.

<sup>7</sup> N'ek'a niyákoj xuta ninku ni xi kuaxihin, tu xi najmi chubayanéhe ngat'aha ni xi tíncha ts'ín.

<sup>8</sup> At'aha xi najmi nkjún maha xuta xinkjín, b'aha ra xi tjintu ni'yaha, kui xi tits'ín t'axín xi s'ejinná ko 'yún ch'onk'un sa nga xuta xi najmi s'ejihin Ntjaná.

<sup>9</sup> Tu j'áihin ní jminchjín xi k'ien x'ihin, xi ja tjihin cháte ko te nú, kui xi kas'et'a xujun, xi nkuhú x'in kis'ejñaha,

<sup>10</sup> xi behe xuta nga nda kits'ín, xi 'mihí nga nda ts'ín kits'ínchá ntíhi, nga nda ts'ín kitsjantehe xuta ni'yaha, nga nda ts'ín kits'ínkjáihin xuta xi ts'e Ntjaná, nga nda ts'ín tsasinko xuta xi un kiekehe ko nga ngayjehe animaha kits'ín ngayje tíkja ni xi nda.

<sup>11</sup> Jminchjín xi ja k'ien x'ihin tunga kjintíhi sa, najmi tu b'et'a xujun. At'aha nk'ie nga kuinchja animaha, ngjuai t'axihin Cristo ko kama mjehe nga kuixan ngáha.

<sup>12</sup> Kui niu n'enijéhe ra, at'aha najmi ngjikondju ni xi tjun kits'ínkjas'eheñ yjoho.

<sup>13</sup> Ko ni xi incha ts'ín ya, ts'e ma ko xki ni'ya incha b'ema. Ko najmi tu suba ts'e ma, én ní ya incha b'emako ko tsungijin yjoho tu mí nihí ni, ko nchja ni xi najmi tjihin nga kuinchja.

<sup>14</sup> Kui b'a maha, mjehena nga kuixahan jminchjín xi ja k'ien xihin xi ndyja saha, ko nga s'ehe ntí ko nga kuasehe ni'yaha, tu xi b'a ts'ín najmi tsjantehe tsa kuinchjayanéhe ra xi fi kontraná.

15 At'aha tjin xi ja ngji t'axin ko yjankihj Satana nd'ai.

16 Tsa ni'yaha xuta xi s'ejihin Ntjaná tjitut'á jminchjin xi ja k'ien x'ihin, katsjáha ni xi machjéhen, tu xi najmi ch'á kamaha ra xuta ninku. B'a ts'in xuta ninku kama kuasinkoho kj'ai jminchjin xi ja k'ien x'ihin xi najmi ch'a xi tjin.

17 Ko máha jácháha xuta ninku xi yja titjun nga nda ts'in tífindjuko xáha, kui xi 'yún kayankjün, b'aha ra xi tjin xá ts'e s'énijmí ko xi bakúya éhen Ntjaná.

18 At'aha b'a títsu éhen Ntjaná: “Najmi tu tsa b'e'ai ts'a chu xi tíasine tunjñu nga títitjá.” Ko b'a ta ts'in tjit'a ya: “Nda xi títs'ínxá tjin kixi nga kamachiji.”

19 Najmi tu n'esihin xi kuatéjéne nku ndacháha xuta ninku tsa najmi tjin tsa jo ko tsa jan já testiyu.

20 Tunga máha xi tu nku tjincha ts'ihin sa ngatitsun, kui xi nginkun ngayjee xuta ninku n'ek'a njyái, tu xi kas'ejña nkjuhun ra xuta ninku.

21 Nginkun Ntjaná ko Jesucristo ko ntitsje xi ts'e, títankihi nga n'etjusuin ni xi tíxihin. Najmi tu ngabi n'ei nga chajehi xuta. Nkuhú n'ei.

22 Najmi tu ch'a chuba mjenéi ntsai nga k'uai xáhi. At'aha tsa chuba k'uai xáha ri, n'engujin yjohi ngatitsuhun. Je katumai.

23 Najmi ta tu nku ntánijua s'ihini. Tu sa ní s'i ichi ko binu tu xi kamandaha kant's'ai ko kuitjuxin ch'in xi nkjin njyá tsjáhi kjuasti.

24 Tjin ngatitsun xi yaha kintehe ni nga n'ekokjua xi b'a kits'ün, ko tjin ngá xi yaha

askahan.

<sup>25</sup> B'a ta ts'ín ya chji chji ni nda xi ts'ín xuta, ko ni xi najmi tjíntuchjí nd'ai najmi kama s'entu'má tehente.

## 6

<sup>1</sup> Máha xuta musu xi kich'atse, b'i ts'ín kats'ínnkjink'un ngat'a ts'e jántjiaha. Katenkjún kjuaxi jóo, tu xi b'a ts'ín chanjúhun Ntíaná ko ni xi títakuyáá.

<sup>2</sup> Ko xi tjíhin já ntia xi s'ejihin Ntíaná, kui xi ta katenkjún, ndaha tsa já nts'e ja tsichu ma jóo. Tu sa ní nda ts'ín kats'ínxát'a saha, at'aha tjoho xi títs'ínkjáihin xáha ko at'aha ta s'ejihin Ntíaná.

Kui ni xi takúyaihi ko tixínyaihi xuta ninku.

### *B'i ts'ín tsakúya Pablo ngat'a ts'e tooon*

<sup>3</sup> Tsa tjín xi kj'ai ni títakúya, nga ja ngji t'axíhin ni nda xi tsakúya Nda Ntíaná Jesucristo ko kjuatéxuma xi bakúyaná nkú ts'ín chanjáán Ntíaná,

<sup>4</sup> xi b'a ts'ín, kui xi chuba nk'ahá tít'asje yjoho. Najmi chumi nihi xi be. Najmi nda títs'ínnkjink'un ko chuba mjehé ra k'uékjoko xuta ko k'uésiyáha tu mí éhen ni. Kui xi b'éntje kjuaxintak'uun ko kjuakjoon, nga ch'on tsuhu xinkjín xuta ko nga najmi s'ejihin xinkjín,

<sup>5</sup> nga kjánkó tehente xinkjín xuta xi ngakjá ts'ínnkjink'un ko xi najmi tjíhin ni xi naxu tjín. Kui jóo xi ni xi ts'e Ntíaná ma nchinántjaihi.

<sup>6</sup> Nga ní yankjáán Ntíaná, kui xi kjuanchiná chánkaná, kui nga najmi ta kj'ai nihi fasíhin raá.

7 B'a tjin at'aha najmi chumi nihi xi jáikaá asunntej ko najmi chumi nihi xi kuankínko ngáhaná.

8 Kui b'a maha, tsa tísakúná nichine ko najyun xi tindyjaá, tsjo kat'ená.

9 Xi mjehe kama nchiná, kui xi najmi maha b'éch'oho yjoho ni xi nchjaha animaha, ko ngayjee ni xi ma mjehe b'ét'a'yúhün niu. Nkjin tjká ni xi ma mjehe, tunga tu a nihí niu ko ts'in'uhün. Ts'ínkatsúhün ko ts'inndyjaha niu.

10 At'aha nk'ie nga 'yún mjehe toon xuta, yo nibáha ra ngayje tjká ni ch'onk'un. Tjin xi b'a incha kits'in, 'yún incha kama mje saha toon, kui nga ngji t'axihin ra ko najmi ta kis'ejihin ra Ntjaná. B'a ts'in ta kui ta maha kits'in'uhün ra yjoho.

### *B'i ts'in kitsjániyáha Pablo Timoteo*

11 Tunga máha ji xi Ntjaná ts'ehi, tiyú t'axihin ngayjee ni xu'bi. Tinchinjin ni xi naxu nginkun Ntjaná, chankjún Ntjaná, ko tu nku n'e s'ejinní Ntjaná. Kas'ehi kjuatjo ko kjuatsenta ko kjuanimatak'un.

12 N'e sahani nga'yún nga ch'ai xi s'ejinná. Ch'a ntsjan ntsjain xi ts'ínk'íejña t'ík'un sínná, at'aha j'ájihin nga kuinchun t'ík'uin. Kui kjuaha nga tsixinyahani nga s'ejihin Jesucristo nginkun nkjin xuta.

13 Ntjaná xi ts'ínk'íéntu t'ík'un ngayjee xi tjin ko Jesucristo xi kitsúya yáha kui nk'ie nga kin'ekokjua nginkun Poncio Pilato, tincha be nga tib'exáha.

14 N'etjusun sisin ni xi tixihin ko najmi tu kas'e má ndyjajihin. B'a n'ei santaha nkúhu nga kj'uaíkúchji yjoho Nda Ntjaná Jesucristo.

15 Kui xi kj'uaí nk'ie nga kuichú chuba, chuba xi Ntíaná y'éjña, at'aha Ntíaná xi n'etsjohō kō kui xi batéxuma suba, kui xi Nda reihí já rej kō Ntíaha já ntia.

16 Nku tutu kui xi najmi maha ndyja, xi tijnajin nd'í nga najmi ch'a ma bichúk'un tiñaha, xi najmi kjee ch'a behe kō najmi ch'a ma base'aha. ¡Kui xi tu nkjéhé ni kayankjún kō kasakúchji nga'yúhūn! B'a katuma.

17 Já nchiná xi tjin asuntei n'ek'a niyái nga najmi tu nk'a k'uasje yjohō kō nga najmi tu kjuanchináha kama 'yún k'un, at'aha maha fe kjuanchinóo. Ntia níná katuma 'yún k'un, kui xi tsjáná ngayje tíkjá ni xi machénná tu xi nda ts'in kuintsubahaná.

18 B'a t'ihin já nchinóo nga kats'in ni xi nda kō nga kui niu xi katuma kjuanchiná ndaha. Katsjáha xuta xingisoo ni xi machjéhen kō najmi tu kats'ínxkihín xuta ni xi tjihín.

19 Tsa ts'ín kui nií, s'ehe kjuanchiná nda xi kuasinkohō kō sakúhu nga k'úentu tík'un xi nkú ts'in tjeheñ ra.

20 Ji Timoteo, n'etjusun sisin ch'á xi kich'anji. Najmi tu nungijin yjohí én tiya xi tjin asuntei kō ta ndaha ni tsank'á xi b'ésiyáha xuta xi b'a tsu nga tjihín kjuankjintak'un.

21 At'aha tjin xi kits'in s'ejin kjuankjintak'un tsank'á xu'bo kō b'a ts'in incha ngji t'axihín ra xi s'ejinná.

Kjuandaha Ntíaná kas'enūu.

**Éhen Ntíaná**  
**New Testament in Mazatec, Jalapa de Díaz**  
**(MX:maj:Mazatec, Jalapa de Díaz)**

copyright © 2013 Wycliffe Bible Translators, Inc.

Language: Mazatec, Jalapa de Díaz

Translation by: Wycliffe Bible Translators, Inc.

Mazateco, Jalapa de Díaz [maj], Mexico

**Copyright Information**

© 2013, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Mazatec, Jalapa de Díaz

**© 2013, Wycliffe Bible Translators, Inc.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 18 Apr 2025 from source files  
dated 29 Jan 2022  
e05183c2-7c34-5cdd-8c78-15ea51bd8cbb